



Lëtzebuerg, de 7. August 2024

Här President,

Esou wéi d'Chambersreglement et virgesäit, bieden ech lech, dës parlamentaresch Fro iwwert **de Projet "Supply4Future" vu Restopolis** un den **Här Minister fir Educatioun, Kanner a Jugend** weiderzeleeden.

Restopolis zerwéiert a sengen iwwer 100 Schoul- an Uniskantinnen all Joer iwwer 3 Milliounen Platen. D'Gesetz vum 20 Juli 2023 huet Restopolis eng eege gesetzlech Basis ginn. Am Laf vun der parlamentarescher Prozedur gouf den entspreche Gesezprojert, verglach mat senger éischer Versioun, substantiell weiderentwéckelt. Sou goufen d'Missiounen vu Restopolis an de Beräicher Nohaltegkeet, Fairtrade, an Déierewuel gestärkt, an et gouf e kloren Accent op den Akaf vu biologeschen a lokale Produite geluecht. Och d'Transparenz an d'Abannung vun der Schoulcommunitéit goufen am Laf vun der legislativer Prozedur gestärkt, zum Beispill duerch de Comité d'accompagnement, deen an der éischer Versioun vum Text nach e reng interministerielle Comité war, mee deen duerch Amendementer erweidert gouf ëm Vertrieder*inne vun de Schüler*innen, Elteren an och de Student*innen.

Fir seng Verpflichtungen am Beräich vun der Nohaltegkeet konkret ëmzesetzen huet Restopolis déi digital Plattform "Supply4Future" op de Wee bruecht. Si erlaabt et klengen wéi grouss Produzent*innen a Verkeefer*inne vu Liewensmëttel, hir biologesch a lokal Produiten u Restopolis ze verkafen. Dës Plattform an déi gesetzlech Verpflichtungen vu Restopolis zum Akaf vu biologeschen a lokale Produiten si wichteg, well de Lëtzebuerger Staat hei an engem wichtige Beräich eng Virreiderroll anhëlt, a well si e Win-Win-Modell duerstelle fir d'Notzer*inne vu Restopolis, fir déi lokal Produzent*inne vu Liewensmëttel a fir eis Ëmwelt. Besonnesch wichteg ass och, dass beim Choix vun de Commanden d'Qualitéit vun de Liewensmëttel (biologesch, lokal) eng méi héich Gewiichtung kritt wéi de Präis.

Säit September 2023 ginn an enger Pilotphas 11 Schoulkantinnen iwwert d'Plattform "Supply4Future" versuergt. Ab der Rentrée 2024 soll d'Plattform an hir definitiv Phas goen an et solle mëttelfristeg all d'Kantinnen a Cafeteriae vu Restopolis iwwert dës Wee beliwert ginn.

An dësem Kontext erlaben ech mir, folgend Froen un den Här Minister ze stellen :

- 1. Wéie Bilan zitt de Minister allgemeng vun der Pilotphas vun der Plattform "Supply4Future"? Wat sinn déi zentral Stärkten a Schwächen, déi dobäi ervirgetruede sinn?**

2. Wéi eng Quantitéiten u biologeschen a lokale Produiten goufen iwwert dës Plattform am ofgelafene Schouljoer akaaft, a wéi verdeele sech dës Akeef op déi grouss Kategorië vu Produiten? Wéi vill Sue goufen op dësem Wee fir biologesch a lokal Produiten ausginn?
3. Wäert d'Pilotphas wéi annoncéiert am September 2024 kënnen ofgeschloss ginn? Kann den Här Minister eis méi Detailler ginn zur geplangter Auswäitung vun der Plattform, a bis wéini se soll generaliséiert sinn?
4. Ass de Comité d'accompagnement vu Restopolis no senger Nominatioun am Fréijoer schonn eng Kéier zesummekomm? Wa jo, wat sinn d'Resultater vun dëser Reunioun?

Mat déiwem Respekt,



Djuna BERNARD
Deputéiert



Äntwert vum Minister fir Educatioun, Kanner a Jugend, Claude Meisch, op d'parlamentaresch Fro Nr. 1092 vun der honorabeler Deputéiert Djuna Bernard

Ad 1)

Mat dem 2023 lancéierte Konzept *Supply4Future*, engem dynameschen an innovativen Akafssystem fir d'Schoukantinnen, huet Restopolis eng digital Plattform ausgeschafft, där hir Attributiounskrittären d'Produktioun vun nohaltege Liewensmëttel favoriséieren an och stimuléieren.

Deen neie System encouragéiert d'Produzente vun all Gréisst, d'Produktioun an d'Diversitéit vu bio-lokale Liewensmëttel ze steigere, an erlaabt hinnen awer och ee méi vereinfachten Zougang zu der Restauratioun vun den ëffentleche Lycéeën an der Universitét Lëtzebuerg.

Wéi déi honorabel Deputéiert schreift, ass déi informatesch Akafsplattform vu September 2023 u fir d'éischt während 12 Méint an 13 Schoul- an Unikantinne getest ginn, ier vum 1. September 2024 un all déi vu Restopolis geréiert Restauranten hir Liewensmëttel doriwwer akafe mussen.

Déi Testphas vun 12 Méint kann een als ee grouse Succès beschreiwen. Vill Produzenten awer och Grosiste vun alle Gréissten hunn no der offizieller Presentatioun vun dem *Supply4Future* am Mee 2023 mat Restopolis Kontakt opgeholl, fir sech iwwert dës nei Liwwerméiglechkeet ze informéieren.

Duerch geziilt Aktiounen wéi ënnert anerem eng Präsenz vu Restopolis op der Foire Agricole Ettelbréck 2023 an 2024 konnt Restopolis zanter dem Lancement vun der Testphas weider Produzente fir d'Plattform dozou gewannen.

An der Pilotphas huet sech erweisen, datt d'*Supply4Future*-Plattform elo scho wesentlech dozou bäidréit, fir d'Entwécklung vun der bio-lokaler Liewensmëttelproduktioun ze verstärken.

Ad 2)

Dir fannt am Unhang zu der Äntwert op dës parlamentaresch Fro d'Zuelen zu den Akeef vu biologeschen, lokalen a bio-lokale Produiten iwwert d'*Supply4Future*-Plattform.

Ad 3)

Vum 1. September 2024 u kafen alleguer d'Schoul- an d'Unirestaurante vu Restopolis hir Liewensmëttel iwwert d'Plattform *Supply4Future*, déi iwwert de Portail des marchés publics funktionéiert.

Ad 4)

Jo, de Comité d'accompagnement ass de 14. Abrëll an de 4. Juli 2024 zesummekomm an déi nächst Reunioun ass fir de 15. November 2024 virgesinn.

D'Reunione sinn ganz konstruktiv an zilen drop of, Restopolis bei senger Missiounen betreffend eng gesond an nohalteg Ernährung zum Wuel vun de Schüler, Enseignanten an all sengen Clienten ze ënnerstëtzen. Zil ass et dem Educatiounsminister all zwee Joer ee schrëftleche Rapport iwwert déi Échangen a Recommendatiounen zoukommen ze loossen.

Lëtzebuerg, de 5. September 2024

De Minister fir Educatioun,
Kanner a Jugend

(s.) Claude MEISCH

Unhang:

- Zuelen zu den Akeef vu biologeschen a lokale Produiten iwwert d'*Supply4Future*-Plattform

Unhang zu der parlamentarescher Fro Nr. 1092

Akeef vu Produiten iwert d'S4F-Plattform (09/2023 - 06/2024)	% par rapport zu de Gesamtakeef iwert d'S4F-Plattform	Ausgaben
Lokal Produiten	70,4%	3.109.577 €
Biologesch Produiten	35,4%	1.563.268 €
Bio-lokal Produiten	29,3%	1.291.850 €

Prozentsaz vun den Akeef vu lokalen, biologeschen a bio-lokale Produkte pro Kategorie op der *Supply4Future*-Plattform vu September 2023 – Juni 2024

